



Norges vassdrags- og energidirektorat - NVE  
Postboks 5091 Majorstua  
0301 OSLO

Saksbehandlar, innvalstelefon  
Eyvin Søltnæs, 5764 3135

## Fråsegn til konsesjonssøknad - Neselva II kraftverk - Gloppen

**Fylkesmannen rår frå konsesjon til Neselva II kraftverk, ut frå vurdering av samla belastning i området. Utbygginga vil påverke ein viktig naturtype og friluftsinnteresser knytt til elva. Sekundært legg vi til grunn at NVE set vilkår om at minstevassføringa om sommaren vert heva til 5-persentilnivå.**

Vi viser til oversendinga 26. mars 2019 med søknad om bygging av Neselva II kraftverk.

### Omtale av tiltaket

Kraftverket vil nytte 182% av middelvassføringa i Neselva frå kote 290 til kote 195, og vil påverke ei 400 meter lang elvestrekning. Røygata skal leggjast sydvest for elva. Eksisterande veg til inntaket for Neselva I skal utbetrast til 3,5 meter breidde som permanent tilkomstveg til kraftstasjonen. Planlagt minstevassføring er 0,2 m<sup>3</sup>/s i sommarperioden og 0,1 m<sup>3</sup>/s i vinterperioden.

Ein estimert årsproduksjon på 11,4 GWh vil bidra til å nå produksjonsmålet for ny grøn energi, og ha positiv økonomisk verknad for lokalsamfunnet og kommunen. Det er tidlegare avslått ein søknad på ein større versjon av Neselva II, på grunn av konflikt med fossesprøytsoner og landskaps- og friluftsverdiar.

### Naturmiljø, landskap og friluftsliv

Øvre delar av nedslagsfeltet inngår i Naustdal-Gjengedal landskapsvernområde. Det går ein tursti frå Nesstøylen og nordover inn i landskapsvernområdet og vidare til Ryssdalsstøylen. Innfart til denne turstien skjer på vegen mellom Ytre Kandal og Nesstøylen/Ytre Kandalstøylen, og dalføret er såleis ein innfallsport til landskapsvernområdet. Utbyggingsstrekninga er langs vegen opp til Kandsalsstøylen. Vi ber NVE framleis vurdere tiltaket ut frå at vassdraget har landskaps- og opplevingsverdi, slik ein gjorde i samband med vedtaket knytt til den første søknaden.

Tiltaksstrekninga vil påverke ein prioritert naturtype, «bekkekløft og bergvegg», utforming bekkekløft (verdi viktig – B). Det er avgrensa tre fossesprøytsoner, med utformingane fosseeng og fosseberg (alle med verdi viktig – B), i bekkekløfta, og ei utbygging vil påverke den nedste av desse. Redusert vassføring etter ei utbygging vil vere negativt for denne fossesprøytsona, og kan føre til at fosseenga gror att. Avbøtande minstevassføring vil avgjere i kva grad naturtypelokaliteten vert negativt påverka. Sett ut frå samla belastning på naturtypen meiner Fylkesmannen det er uheldig å opne for ytterlegare utbygging av Neselva.

### Avbøtande tiltak

Planlagt minstevassføringa om sommaren er berre 22 % av 5-persentilen, som har vorte eit vanleg



nivå for nyare utbyggingar som vil påverke viktig naturmiljø eller friluftsliv. Vi konstaterer at vassutnyttinga er auka samanlikna med prosjektet som vart avslege (150% til 182% av middelvassføringa). På grunn av snørike fjellområde og noko brefelt har elva naturleg høg sommarvassføring, så ei minstevassføring på 0,2 m<sup>3</sup>/s kan opplevast som eit stort naturinngrep i store delar av sommarsesongen. Dersom det vert opna for tiltaket er det viktig med vilkår for å avbøte skade på fossesprøytsone, og oppretthalde elva som eit tydeleg landskapselement. Ut frå dette bør minstevassføringa hevast til 5-persentilnivå.

### Samla belastning

Neselva I kraftverk utnyttar fallet frå kote 195 til Breimsvatnet kote 62, slik at avløpet frå eit eventuelt Neselva II vil gå rett over i det eksisterande kraftverket. Det opphavlege søknaden for Neselva II kraftverk som vart avslått var del av «Jølster-pakka», og i bakgrunnsnotatet for vedtaket vurderte NVE at tal kraftverk og utbygt del av vasskraftpotensialet i Gloppen kommune var høgt. Seinare har «Gloppen-pakka» på tolv småkraftsøknader vorte handsama, og sju nye utbyggingar i Gloppen kommune fekk konsesjon i 2016.

### Konklusjon

Det nye og reduserte søknaden for Neselva II kraftverk vil påverke viktig naturmiljø og landskapsinteresser, men altså i mindre grad enn det opphavlege prosjektet. Vi vil likevel peike på at den nedste fossen kan høyrast og har viktig opplevingsverdi, sjølv om den er lite synleg frå sjøve stølsvegen. Også i det nye prosjektet vil viktige naturkvalitetar verte påverka. Fylkesmannen vil ut frå dette rå frå utbygging. Vi ber NVE vurdere den auka samla belastninga på vassdragsnaturen på nytt, i lys av alle konsesjonane som no er gitt i dette området. Dersom NVE opnar for utbygging av Neselva II legg vi til grunn at det vert vilkår om auka avbøtande minstevassføring.

Med helsing

Eline Orheim  
seksjonsleiar

Eyvin Søltnæs  
seniorrådgjevar

*Dokumentet er elektronisk godkjent*

Kopi til:

Sogn og Fjordane fylkeskommune	Askedalen 2	6863	LEIKANGER
Gloppen kommune	Grandavegen 9	6823	SANDANE
Miljødirektoratet	Postboks 5672 Torgarden	7485	TRONDHEIM